

Kanak-kanak mangsa Nargis diancam kebuluran

FAKTA NOMBOR

Taufan Nargis

2.5 juta
Mangsa melarat

128,000
Anggaran korban

78,000
Disahkan mati

56,000
Masih hilang

50,000
Terima bantuan



MANGSA NARGIS: Kanak-kanak Myanmar berbaris dalam hujan ketika menunggu giliran mengambil makanan di pusat bantuan di Laputta, kelmarin.

YANGON: Agensi bantuan antarabangsa berkata beribu-ribu kanak-kanak mangsa tau-fan Nargis berisiko mengalami kebuluran yang boleh membawa kematian dalam dua hingga tiga minggu lagi kecuali memperoleh bekalan makanan segera.

Agensi Save the Children memberi amaran itu ketika masyarakat antarabangsa semakin hampa dengan sikap pihak junta Myanmar yang masih melambatkan pemberian kelulusan kepada petugas bantuan memasuki negara itu.

Pertubuhan Bangsa-Bangsa Bersa-

tu (PBB) berkata pemerintah junta Myanmar melarang pengimportan peralatan komunikasi, yang menjajaskan usaha agensi bantuan untuk saling berhubungan.

Laporan keadaan terbaru PBB kelmarin menganggarkan 500,000 mangsa dapat dihubungi untuk mendapatkan bantuan kecemasan yang disumbang masyarakat antarabangsa, tetapi rejim itu bertegas mengendalikannya sendiri pengagihan kepada mangsa.

Menurut laporan, semua peralatan komunikasi yang digunakan oleh agensi asing perlu dibeli menerusi

Kementerian Pos dan Komunikasi, dengan maksimum 10 telefon bagi setiap agensi berharga AS\$1,500 (RM4,800) setiap satu. Peralatan import tidak dibenarkan.

Radio kerajaan berkata, kerajaan setakat ini memperuntukkan 20 bilion kyat (RM6.4 juta) untuk usaha bantuan dan menerima bekalan bantuan bernilai berjuta dolar daripada penderma tempatan dan antarabangsa serta mengedarkannya dengan segera dan berkesan ke kawasan terjejas.

Bagaimanapun, agensi bantuan tidak yakin dengan laporan itu. Save the Children, semalam berkata pihaknya

bimbang ramai kanak-kanak di kawasan terjejas kini menderita kekurangan zat makanan teruk dan menghadapi tahap kelaparan amat serius.

"Apabila sampai ke tahap ini, mereka boleh mati dalam masa beberapa hari," kata Jasmine Whitbread, yang mengetuai operasi agensi itu di Britain.

Kemarahan antarabangsa semakin memuncak berhubung cara Myanmar mengendalikan bencana itu.

Perdana Menteri Britain, Gordon Brown, menuduh pihak berkuasa di negara itu menghalang bantuan asing daripada tiba kepada mangsa

dan berkata rejim tentera lebih mementingkan diri sendiri berbanding kebajikan rakyat.

"Ini langsung tidak berperikemanusiaan," katanya kepada Perbadanan Penyiaran Britain.

Di sebuah bandar berhampiran bandar raya Yangon, pelarian yang keletihan dan kelaparan berdiri dalam sinar matahari terik di tepi sawah yang dibanjiri air dan biara dan pondok yang musnah. Dengan ketibaan setiap kenderaan membawa makanan dan air, mereka melompat kegembiraan dan segera berebut mendapatkan habuan. - AP